



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 698, Datë 20.07.2020

“Për disa rekomandime për Autoritetin e Mbikëqyrjes Financiare në lidhje me licensimin e Postës Shqiptare për ushtrimin e veprimtarisë së agjentit në sigurime”

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 20.07.2020, shqyrtoi çështjen me:

Objekti: Për disa rekomandime për Autoritetin e Mbikëqyrjes Financiare në lidhje me licensimin e Postës Shqiptare për ushtrimin e veprimtarisë së agjentit në sigurime

Baza Ligjore: Neni 8, neni 9, neni 24, shkronja (d), neni 26 dhe neni 70 i Ligjit nr. 9121, datë 28.07.2003 “Për mbrojtjen e konkurrencës”, i ndryshuar (Ligji nr. 9121/2003).

Komisioni i Konkurrencës, pas shqyrtimit të:

- Vlerësimin ligjor mbi shqyrtimin e kërkesës së Postës Shqiptare për ushtrimin e veprimtarisë së agjentit në sigurime.

VËREN SE :

1. Pranë Autoritetit të Konkurrencës, me shkresën nr. 1355 prot., datë 16.06.2020 (protokolluar pranë AK me nr. 236 prot., datë 18.06.2020) Autoriteti i Mbikëqyrjes Financiare (AMF), nisur nga pozita e veçantë e Postës Shqiptare ka depozituar kërkesën për opinion për pajisjen me licencë për ushtrimin e veprimtarisë së agjentit në sigurime nga kjo drejtori.
2. Posta Shqiptare me shkresën nr. 1260 prot., datë 30.06.2020 (protokolluar pranë AK me nr. 251 prot., datë 30.06.2020), ka depozituar pranë Autoritetit të Konkurrencës dokumentacionin përkatës lidhur me miratimin për kryerjen e veprimtarisë si agjent në sigurime.

3. Posta Shqiptare citon se ka ushtruar veprimtarinë e agjentit të tregut të sigurimeve bazuar në licensën nr. 369, datë 21.12.2012 “Për ushtrimin e veprimtarisë së agjentit në sigurime jo – jetë në emër dhe për llogari të shoqërisë së sigurimit INSIG” SH.A”, lëshuar nga Autoriteti i Mbikëqyrjes Financiare e vlefshme për periudhën 2012-2015.
4. Qëllimi i kësaj veprimtarie si agjent i sigurimeve jo – jetë ishte shitja e policave të sigurimit jo-jetë për llogari të kompanisë së sigurimit INSIG, aktivitet që ofrohej si çdo shërbim tjetër në sportelet e Postës Shqiptare kundrejt një komisioni, p.sh. shitja e kuponave ALEAT, shërbimin e-albania e të tjera.
5. Në kushtet e rinovimit të kësaj licencë, Posta Shqiptare SHA ka aplikuar pranë Autoritetit të Mbikëqyrjes Financiare për licencimin e këtij aktiviteti. AMF duke ju referuar kërkesave ligjore si në Vendimin të Bankës së Shqipërisë nr. 01, datë 17.01.2013 “Për licencimin e veprimtarisë nga subjektet financiare jo banka”, i ndryshuar, ka kërkuar paraprakisht një konfirmim nga Banka e Shqipërisë, i cili ka për qëllim verifikimin e dokumentacionit sipas akteve ligjore dhe nënligjore.
6. Banka e Shqipërisë me Vendimin nr. 1473, datë 05.03.2020 ka vendosur për dhënien e miratimit paraprak për kryerjen e veprimtarisë si agjent i sigurimeve nga subjekte financiare jo bankë” për Postën Shqiptare” SH.A.
7. Posta Shqiptare SH.A shprehet se pas komunikimeve dhe takimeve me AMF ka plotësuar të gjithë dokumentacionit ligjor nga me qëllim shqyrtimin dhe miratimin e aktivitetit të agjentit në tregun e sigurimeve të cilin e ka depozituar dhe në AK.
8. Autoriteti i Konkurrencës në zbatim të nenit 70 të ligjit nr. 9121/2003 “Për mbrojtjen e konkurrencës” bashkëpunon me çdo organ të administratës publike, dhe ent rregullator për të siguruar një konkurrencë të lirë dhe efektive në treg, dhe nga ana tjetër çdo entitet publik është i detyruar në mënyrë individuale të zbatojë dispozitat e këtij ligji, për të siguruar edhe ai një konkurrencë të lirë dhe efektive, në fushën e rregullimit të tij.
9. Posta shqiptare është shoqëri anonime e krijuar në bazë të legjislacionit të Republikës së Shqipërisë nga transformimi i ndërmarrjes së Postës Shqiptare emërtohet "Posta Shqiptare" SH.A dhe është shoqëria më e madhe tregtare që operon në tregun e shërbimeve postare dhe financiare.
10. Sipas nenit 4 të Statutit: 1. objekt i veprimtarisë së shoqërisë është aktiviteti i gjithë shërbimeve postare, financiare dhe bankare: aktiviteti i shërbimeve bazë të telekomunikacioneve dhe elektronike; botimi i gazetës online "Postieri"; aktiviteti radiofonik "Radio Posta"; veprimtari biznesi; etj. në përputhje me legjislacionin në fuqi. 2. Shoqëria, në përputhje me legjislacionin në fuqi, do të kryejë çdo veprimtari tjetër që lidhet drejtpërdrejt ose tërthorazi me objektin e parashikuar në pikën 4. 1. Kjo përfshin gjithashtu zgjerimin e aktivitetit, krijimin e shoqërive të reja, si dhe pjesëmarrjen në kapitalin e shoqërive të tjera brenda dhe jashtë vendit. Pra, Shoqëria

mund të marrë pjesë nëpërmjet investimeve apo kontributeve kapitale si ortakë ose aksionerë në shoqëri përgjegjësi të kufizuar, shoqëri aksionare, apo në forma të tjera të organizimit apo shoqërizimit, të cilat i krijojnë vetë ose tek të cilat merr pjesë me ortakë/aksionarë të tjerë vendas apo të huaj.

11. Banka e Shqipërisë me licencën nr. 03, datë 18.04.2001 i ka dhënë Postës Shqiptare SHA licencën për të ushtruar veprimtari financiare si “subjekt financiar jo bankë”.
12. Posta Shqiptare SHA është i vetmi operator publik postar, në tregun shqiptar e cila drejton administron dhe zhvillon rrjetin postar kombëtar si dhe ka detyrimin për përmbushjen e shërbimeve bazë postare.
13. Posta Shqiptare SH.A gjatë zhvillimit të veprimtarisë, sa më lart dhe shtrirjes gjeografike, në bazë të nenit 8 të Ligjit nr. 9121, datë 28.07.2003 “Për mbrojtjen e konkurrencës”, i ndryshuar ka pozitë dominuese në tregun e shërbimeve postare në territorin e Republikës së Shqipërisë.
14. Bazuar në nenin 194, pika 4, të ligjit nr. 52/2014 “Për veprimtarinë e sigurimit dhe risigurimit”, parashikon se veprimtaria e agjentit mund të kryhet edhe nga bankat, degët e bankave të huaja ose subjektet financiare jobanka, pasi të kenë marrë më parë miratimin nga Banka e Shqipërisë, si dhe subjekte të tjera, sipas rregullave të përcaktuara nga Autoriteti.
15. Sipas nenit 9, të Rregullores nr. 79, datë 31.08.2015 “Për miratimin/licencimin e personave për të ushtruar veprimtarinë e agjentit në sigurime, si dhe rastet e mospranimit të regjistrimit të tij dhe refuzimit të licencës”, Posta Shqiptare ka depozituar pranë AK dokumentacionin përkatës sipas kërkesave ligjore
16. Referuar sa më sipër, nga vlerësimi ligjor i kërkesës për opinion depozituar nga AMF, në kuadër të liberalizimit të tregut, vlerësojmë se kjo kërkesë për ushtrimin e veprimtarisë së ndërmjetësimit si agjent në sigurime nga Posta Shqiptare SHA, nuk bie në kundërshtim me ligjin nr. 9121/2003, “Për mbrojtjen e konkurrencës”.

PËR KËTO ARSYE:

Komisioni i Konkurrencës, bazuar në nenin 8, nenin 9 dhe nenin 70 të Ligjit nr. 9121, datë 28.07.2003 “Për mbrojtjen e konkurrencës”, i ndryshuar,

VENDOSI:

1. T’i rekomandojë Autoritetit të Mbikëqyrjes Financiare, si autoriteti përgjegjës që licencën dhe mbikëqyr veprimtarinë e ndërmjetësve në sigurime në zbatimin e ligjit nr. 52/2014 “Për veprimtarinë e sigurimit dhe risigurimit” përpara licensimit, ti kërkojë Postës Shqiptare:
 - a) të lidhë kontrata të veçanta me të gjitha shoqëritë e sigurimit.
 - b) të mos vendosë, në mënyrë të drejtpërdrejtë ose të tërthortë, çmime të padrejta të blerjes ose shitjes apo e kushteve të tjera të padrejta të tregimit;

- c) të mos zbatojë kushte të pabarabarta për veprime tregtare të njëjta me palët, duke i vendosur ato në gjendje të pafavorshme konkurrence;
- d) të mos vendosë kushte për lidhjen e kontratave me palët e tjera, që këto të fundit të pranojnë detyrime shtesë, të cilat, për vetë natyrën e tyre ose sipas praktikave tregtare, nuk kanë lidhje me objektin e kontratave në fjalë.
- e) të tregtojë produktin e sigurimit me logon e shoqërisë së sigurimit dhe barkodin përkatës në përputhje me dispozitat e Ligjit nr. 52/2014 “Për veprimtarinë e sigurimit dhe risigurimit” për të shmangur koordinimin e sjelljes, ndarjen e pjesëve të tregut dhe caktimin e çmimeve mes shoqërive të sigurimit dhe Postës Shqiptare.

2. Ngarkohet Sekretari i Përgjithshëm për zbatimin e këtij vendimi dhe njoftimin e palëve të interesuara.

Ky vendim hyn në fuqi menjëherë.

KOMISIONI I KONKURENCËS